

14 *Juli* 1566.

*Lettre missive de Son Altèze au Prince d'Orenge, en date
le 14 de Juillet 1566.*

MON BON COUSIN,

Par voz lettres du jour d'huy, j'ay veu ce que advint au jour d'hier à vostre arrivée en la ville d'Anvers, et ne doubte point que telles acclamations mentionnées en vos dictes lettres ne vous aurent esté guaires agréables : toutesfois m'asseure que, pour vostre bonne prudence, dextérité et affection au service du Roy, mon Seigneur, voz n'obmectrez chose pour remédier les affaires au mieulx et plustost que pourrez, et d'aaultant qu'à vostre dicte venue, avez trouvé les choses plus turbulentes, d'aaultant vous sera plus d'honneur de les remédier et pacifier, selon que, à vostre partement, je vous ay requis bien instamment, comme je fais encoires par cestes, remectant le tout en vostre grande fidélité et prudence; et suis, avecq désir, actendant sçavoir l'ordre que vous aurez advisé avecq ceulx de la ville, de donner à ces troubles. A tant, mon bon cousin, Nostre Seigneur vous ait en sa garde. De Bruxelles, ce XIII^e de Juillet 1566. Soubscript : Vostre bonne cousine : MARGARITA, et plus bas : VANDER AA.

Et superscript : A mon bon cousin le Prince d'Oranges, Conte de Nassou, Chevalier de l'Ordre, Conseillier d'Estat et Gouverneur du Conté de Bourgoingne et pays d'Hollande, Zélande et Utrecht.

Collationnée à l'auctenticque copie, est trouvée
accorder par moy,

A. GRAPHEUS. (1)